

# Hair

Mammie's hair is lang an broon.  
Granny's is white as snaa,  
Dad's is laek a hedder-kowe  
an Daa haes nane avaa.

Anutie Jean's is sometimes green,  
sometimes it's orange-strippit.  
Uncle Dean's faas ower his een.  
Mam says he's needin clippit.

Me bridder Mikey's hair is spikey.  
Wir Lizzie haes frizzie hair,  
an when Mam gengs ta brush it oot  
shö runs an hoids upstair.

Wir Davie's hair is wavy  
Jack's is short an black.  
Emma haes twa boannie pletts  
at hings doon ower her back.

Wir baby's hair is raelly fair  
but da day it looks bright red  
for half da carrots on his plate  
is laanded on his head.

Mam says Joe haes a coo's lick.  
I canna tink what wye  
for he's a scaredy peerie ting  
an wid never geng near da kye.

As for Matt, his hair is flat  
An what can I say about mine?  
Hit's straight wi a fringe an I wiss it wis curly.  
Tell me noo, what laek is dine?

*Christian Tait*

